



Mer geen in d Luft — syt 100 Joor

*Bisch Duubedänzig vor luter Styyre,
Abgoobe, Buesse, z hooche Gebyyre,
dr Bolitigg und Byyrograate wo regiire
geen d Flieger in d Luft zem sich abreagiire.
Doch isch bim Bebbi dr Nuggi duss
macht är e Fasnachtssujet druss.*

Vor 100 Joor hän sich d Schwyzer gsait,
mir fliege jetz au, wenn d Luft uns drait.
Mit Stoff und Glääbi ass es au haut,
hän si die eerschte CH-Flugkische baut.
Vom Wallis isch ain iiber d Alpe gflooge
und het bi de Tschinggen e Kurve zooge.
Am Boode sin si scho d Faane go hisse,
do het dä arm Siech e Seppi grisse!

In de näggschte Joorzäänt vor em Wältgrieg II
isch d Flugbegaischterig gstiige bi Gross und Glai.
In jedem Kaff hän si Flugdääg abghalte
und Verruggti sin kurvt iiber Gletscherspalte.
Z Basel hän s gsait das wänn mir au bi uns
und hän e Flugplatz baut z Blätzbums.
Fir dr Bebbi isch das e gwaltige Sääge,
isch diggi Luft deheim bisch schnäll iiber d Bäarge.

Zem in d Luft goo muesch nit unbedingt fliege,
au sälmool scho hesch kenne Veegel griege,
sig s wäg em Märthallebau und neie Brugge,
em Ochsnerkiibel wo d muesch Abfall yynedrugge,
em neie Felse im Zolli fir d Affe
oder em Kunschtmuseum wo jetz kasch begaffe.
Het me ebbis verordnet oder welle baue
an dr Fasnacht hän si s in d Pfanne ghaue.

Denn hän s no fir s nei Volggshuus gstumme
Doch denn hän d Flieger afoo brumme:
"Jetzt verdeggele nundefaane
muess e neie Flugplatz aane."
Z Witterwil im Laimedaal hinde
hän sii en Agger kenne finde.
Vo deert sin s denn go Looping broobe,
wil d Wält gailer isch so verkeert vo oobe.

Noch em Grieg isch s Fliege bequäämer worde,
doch maischtens sin d Bonze gflooge – noonig d Horde –.
Vo Blootze, no uff Staalblattepische,
bisch uff Berlin in Dobbeldeggerkische.
Do isch ain uff New York imme Fluugi mit Propäller,
gratis Suffe hets gää und s Ässe uff Täller.
Kuum gstartet sait dä Gleetzi zue siiner Beglaitig:
"kumm loss mi schnäll uuse, i ha Drugg uff dr Laitig."

Im e Jumbo Jet e baar Joor speeter
isch e Haimwee-Bebbi uff Bsuech koo, do het er
e Frind gfroggt: „was isch do gloffe die letscht Zyt?“
Dä maint: „I verzell dr s gärn, doch kumm mit
ain go schnabbe duss vor em Casino“.
"Lueg was an de Fasnächt isch koo" sait er, und dringgt si
Vino.
"s Baue, dr Pabscht und Regierigsmittglieder".
"Also allewyl s Glyych, denn kumm i in 10 Joor wiider!"

Au das Joor isch e Hufte gschee
Wo d Lyt in d Luft sin und Sujets wird gee:
Bim Bell hän d Klepfer leere schwimme,
z Bärn isch dr Laiebärger nimme,
z Basel wänn s mit Bierdeggel neii Birger finde,
und d Baizer schleen queer mit Fumoirs grinde.
Doch s Ainzig wo in de Fumoirs no ummeffliegt
sin die Bierdeggel bivoor me si an d Biire griegt.

S halb Volgg jettet hit in dr Wält ummenand
und mer fyre 100 Joor Fliege im Schwyzerland
doch wäg dr Äsche vo Island sin d Flugblätz zue
und so hän si z Allschwil e Wyyli Rue.
Mit dääne Fluugi isch das nämlig soon e Sach,
d Lyt kenne nimm penne wäagen em Grach.
Drum wenn d gnueg hesch vo däm ganze Misch
Laufsch uff e Gämpe als Ruggsagg-Turischt.

Hitte isch s Fliege nimme so toll
de stoosch nur no Schlange und d Fluugi sin voll.
Bim Yystiige durlyyichte si no di Gepägg
und nämme dr alles wo scharf isch ewägg,
sogar no dr Nagelclipper vo dr Dante.
D Frau Fasnacht mit iire Egge und Kante
wurd'sch nie dur die Kontrolle griege.
Do kasch nur hoffe, dass si nie muess fliege.

Bsuech is au uff www.klosterraebe.ch

**Nit in d Luft muesch fir d Ladäärne-Uusstellig uff em Minschterplatz
und d Waage- und Reggwisyte-Uusstellig bi dr Kasäärne. Si sin
offe vom Määntig znacht bis am Mittwuch demoorge!
Deert und an de 3 Verkaufsständ (CINS) in dr Stadt ka men au alli
Zeedel und Schnitzelbängg, d Blaggede und dr Rädäbäng kaufe.**

**Am Sunntig, 20. Meerze isch d Zeedelläasete vo 17 – 19 h NEU im
Meriansaal vom Hotel Merian/KaffiSpitz; dr Ytritt isch vergäbe,
Getränkebuffet in dr Pause.**